

DECLARATION (2)
DE
MARC ANTOINE
DE DOMINIS, AR-
CHEVESQVE DE
SPALATRO, METROPOLI-
tain des deux Royaumes de
Croatie, & Dalmatie.

Sur les raisons qui l'ont mené à se departir de l'Eglise Romaine.

Tournée du Latin de l'Auteur, imprimé à Venise
le 20. de Septembre 1616.




A SAVMYR,

Par THOMAS PORTAV.
M. DC. XVI.


DEPARTMENT OF
THE
MARITIME
COMMISSION
Case
F
39
326
1616

THE NEWSPAPER
LIBRARY





DECLARATION DE MARC ANTOINE
*de Dominis, Archevesque du Spalatro, Metropolitain de Croa-
 tie, & Dalmatie, sur les raisons qui l'ont meu à se departir de
 l'Eglise Romaine.*

 **R**AIGNANT que ce mien depart si su-
 bit, & contre l'opinion de tout le monde,
 minuté toutesfois en moi-mesme par une
 longue consultation de plus de dix ans, &
 hasté par une meure & exacte delibera-
 tion, n'estonne nos gens, & ne produise
 en eux quelque mauvais effects, si en me taisant je les
 laissois ignorans de mon dessein, j'ay creu qu'il me falloit
 par une anticipation necessaire, exposer les raisons, & les
 causes de mon departement, qui n'a nullement esté fait à
 l'estourdie, mais avec tres-bonnes considerations.

Certes je prevoi bien que je n'auray pas faute de mes-
 disans, qui prendront d'icy occasion de me charger d'in ju-
 res & calomnies selon leur façon ordinaire. Mais cela, je
 le dis devant Dieu, ne me met pas beaucoup en peine.
 Car, comme dit S. Paul, il me cheut bien peu d'estre
 jugé par les hommes. Que ie sois fou pour l'amour de
 Christ, mesprisé, souffleté, injurié, persecuté, outragé de
 calomnies, que ie sois la racleure, la balieure du monde,
 anatheme mesmes: pourveu que ie contente Christ mon
 Seigneur, & serue à mes freres au ministere de Christ, ie
 ne dois tenir aucun conte du reste. Ma gloire est le tes-
 moignage de ma conscience, que ie change de lieu en la
 simplicité de mon cœur, en la sincerité de Dieu, non en

sageſſe charnelle, mais en la grace de Dieu. C'eſt à moi, comme eſtant miniſtre de Chriſt, à me porter avec patience en afflictions, en neceſſitez, en angoiſſes, & travaux, parmi honneur & ignominie, parmi diffame, & bonne renommee. Car ie ne cherche point mon propre, mais ce qui eſt de Ieſus Chriſt.

Ie ſuis bien plus en peine de ce que ie voi, que le fruit de dedication, que les eſprits des fideles pourroient peut eſtre recueillir de ma reſolution: ſera aiſement empesché ſi ie ne vay au devant de la meſdiſance, & calomnie, & que beaucoup, au lieu d'en eſtre edifiez, tomberont à cauſe de moi en quelque ſcandale, par les iniuſtes calomnies dont on les abbreuuera, ſans eſtre informez de mes procedures. Et c'eſt principalement à ceux-là que i'ay eſgard, en declarant ici & decouvrant les raiſons de mon partement.

Ie ne puis ni ne dois aucunement entrer en doute, que ma vocation a changer de demeure, ne ſoit diuine, non humaine. Ie ſçai qu'il ne faut pas croire à la legere toutes ſortes d'Eſprits, mais qu'il faut eſprouver les eſprits ſ'ils ſont de Dieu, comme Sainct Iean le bien aimé diſciple de Chriſt nous en aduertit. En ces eſpreuves dont, excepté que par l'eſpace de dix ans entiers, comme i'ai dit, ie me ſuis ſouvent approché du Pere des lumieres, ſelon que ie l'auois appris de Ieſus Chriſt, ie puis certifier, & en appelle Dieu & ma conſcience à teſmoins, qu'il n'eſt venu à mes oreilles ſur ce ſubieſt, parole ou exhortation d'homme quelconque. Ie n'ai iamais eu perſonne qui m'y conuiaſt, qui me le conſeillaſt, n'y ai onc employé l'advis d'aucun, n'en ai conſéré avec ame vivante. Et qu'on ne penſe pas non plus que i'aie puisé ce deſſein dans les livres contraires à l'Egliſe Romaine. Ie proteſte devant Dieu, que j'ai toujours eu en une extreſme horreur les livres profcris, & censurez par la diligence des Papes. Et ſ'il y eut iamais Prelat en l'Egliſe Romaine qui les ait deteſtez, ie

puis dire, que c'est moi, en ayant conçu dès mon enfance ie ne sçai quelle vaine apprehension. Et certe en cest aage proche de soixante ans, ie ne suis plus enfant, pour me laisser persuader au premier venu tout ce qu'on voudra sans le poids d'aucunes raisons. Iamais ie n'ai gouverné les mouvemens & desseings de mon esprit, par autres regles, que celles qui ont esté prescrites à toute l'Eglise par le S. Esprit és Escritures, par la conduite desquelles les saints Peres orthodoxes, celebrez & honorez de tout temps en l'Eglise Catholique, ont instruit les Chrestiens. Ces saints Peres seuls, apres les mouvemens interieurs de l'Esprit de Dieu, m'ont esté suffisans auteurs de ceste resolution. Et donc pourquoy me feroit-elle suspecte, comme si elle provenoit de l'Esprit malin? Ioint que ie suis asseuré devant Dieu, qui sonde les cœurs & les reins, de n'avoir jamais en ma deliberation tourné l'esprit à des considerations humaines & temporelles: Non aux dignitez Ecclesiastiques, qui sembloient convenir à ma condition. Car i'estois Evesque, & non des moindres, ains le premier de mon païs, asçavoir Archevesque de Spalatro, autresfois Salone, Primat de deux Royaumes Dalmatie & Croatie, avec autant de reputation (ie n'ai point honte de le dire) qu'aucun autre és Eglises de nos Prouinces. Que si les dignitez de Rome m'eussent agréé, i'y ai tousiours eu assez d'accez & d'entrée. Mais les mœurs de la Cour Romaine, que ie n'ai jamais approuvé, me l'ont fait avoir en horreur. Et toutesfois le Siege n'a pas laissé de se servir de moi, en affaires publics & de consequence vers l'Empereur & les Archiducs. Les brefs du Pape, les lettres de l'Empereur, & des Archiducs, que ie garde par devers moi, en font foi. Mes services aussi à la serenissime Republique de Venise, m'avoient acquis sa bonne grace, d'elle qui est mon Prince naturel, D'où ie pouvois attendre & esperer une plus grande fortune, si i'eusse esté desireux d'en avoir d'avantage.

Non plus aux commoditez temporelles. I'en avois assez pour contenter un esprit moderé, tel que i'ay tousiours eu par la grace de Dieu. En ce changement de demeure au contraire, ie recoi & embrasse volontiers la perte que ie fay de mes honneurs, & de mes biens: parce que ie ne cherche pas mon propre, mais le propre de Christ, comme i'ay desia dit. Ainsi ce n'a esté aucune raison humaine, qui m'a fait quitter le pays, non quelque affection desbordée, non une necessité temporelle, non une adversité, ou quelque triste adventure, qui ont accoustumé de transporter les hommes. Mais ie m'en vai vous dire franchement, sans fard, & sans fraude, ce que ç'a esté.

Certes i'ai esté des mon enfance nourri en l'estude de la Theologie, selon la doctrine commune des Scholastiques, & les opinions de l'Eglise Romaine, entre les Iesuites pour la plus part. Opinions, que ie m'estois tellement imprimées, & si avant enracinées en l'ame, par autorité plus que par raison, y ayant veritablement captivé & asservi mon entendement, que ie fusse mort & volontiers pour les defendre. Je pensois que c'estoit un crime enorme d'admettre contre elles le moindre doute d'esprit, ou de pensée, non que d'asseurer quelque chose qui y fust contraire. Et engagé à la religion commune, si quelquesfois une pensée se glissoit en mon ame qui y contrevint: si la lecture de la Bible m'y suggeroit quelque doute: ie me faisois force à moi mesme, ne plus ne moins qu'en choses qui concernent la foi: Je destournois mon esprit ailleurs, le divertissois, de peur de donner entrée au moindre doute contre ce que i'estimois estre vrais articles de foy. Car pour tels nous les vend-on, enfans que nous sommes. Je confesse que i'ay tousiours senti dedans moi quelques petits feux du saint Esprit, mais i'y resistois. Et si n'ai pourtant iamais peu acquiescer pleinement, ni me defaire entierement du soupçon qui m'a

touſiours tenu en cervelle, depuis que j'en profité en l'estude de la sainte Theologie. Ce qui augmentoit mon ſoupçon eſtoit ceste diligence ſi exacte, ſi rigoureuse, avec laquelle ie vois qu'on empeschoit ſi ſoigneuſement tant entre nous, qu'à Rome, qu'aucun ne peult avoir ou lire les livres contraires à la doctrine des Papistes. Pour le vulgaire, il me ſembloit qu'on avoit raiſon de lui defendre, de peur que des gens deſtituez de iugement & de diſcretion, ne fuſſent par là en danger de ſ'abreuver de quelques fauſſes opinions. Mais qu'on les oſtaſt du tout aux eſtudiants, à ceux meſmes qui ſont les mieux affectionnez à la foi Catholique, qui ſont puiffans en la ſaine doctrine, cela certes ma touſiours eſté ſuſpect. Et la raiſon meſme le ſemble dicter à chacun : veu principalement que la Cour de Rome ne permet aucunement d'avoir tels livres, non pas meſmes apres avoir achevé ſes eſtudes en Theologie, avoir pris ſes degrez en ceste faculté, avoir eſté promu à quelque Eveſché. Mon ſoupçon ſe fortifioit encor, quand ie vois que les Maîtres & professeurs en traitant publiquement les controverſes ſoit par parole, ſoit par eſcrit, veulent qu'on leur adioute foi en tout & par tout, qu'on croie que les opinions & les dits des Adverſaires ſont tels que ils les propoſent, ſans qu'il ſoit permis aux Auditeurs, ſous peine d'excommunication, de lire les eſcrits meſmes des Adverſaires. On met tant de peine à les cacher, les ſupprimer, & les perdre, que cela meſme peut donner ſubiet de ſe douter qu'il y a en eux des choſes que noſtre doctrine ne ſçauroit ſuffiſamment refuter & deſtruire.

Des les premieres années de ma Clericature, ie nourriſſois en moi, vn deſir preſque né avec moi, de voir l'union de toutes les Eglises Chreſtiennes. Et ai touſiours regretté la ſeparation de l'Orient d'avec l'Occident, du Midi d'avec le Septentrion és articles de foi. Et deſirois paſſionnement reconnoiſtre la cauſe d'un ſi grand ſchiſme: d'au-

ser si on ne pourroit point trouuer quelque moien de ramener toutes les Eglises Chrestiennes à leur vraie & ancienne vnion. Je brulois d'envie de le voir quelque iour, Estois tourmenté en moi mesmes d'une douleur d'esprit, née de tant de disputes entre ceux qui font profession de la Religion Chrestienne: des haines si aspres dont ie vois les plus belles Eglises enflammées les vne contre les autres: du saie de Iesus Christ si vilainement rompu & déchiré. Douleur & tristesse extreme, qui me chagrinoit merueilleusement, & me continue encor tous les iours de plus en plus.

En fin ie fus promu, il y a desia plus de vingt ans, au gouvernement de l'Eglise, & créé Euesque de Segnio. Mes peres le suites n'en estoient pas gueres contens. Car ils reconnoissoient, & éprouvoient en effect que ie n'estois pas inutile à leur compagnie (& de cela, non plus que du reste, ne tien-je pas grand cōte, mesprisant, comme ie dois, toute reputation humaine, si ce n'est qu'elle face pour le service de Dieu.) Durant le temps de ma probation, ou épreuve, estant encor ieune homme, ils m'avoient employé à la professiō des lettres humaines és colleges publics de Verone. Depuis avant que prendre l'ordre de prestise, ils me dōnerent la chaire publique des Mathematiques à Padouë, où i'enseignai avec une grāde assistance d'Auditeurs. A Brelle ils me firent premierement Professeur en Rhetorique: puis en Logique, & Philosophie és echoles publiques. Souvent aussi ils me faisoient prescher es temples les iours de feste: m'ont maintesfois donné charge de leurs affaires particulieres, qui n'estoient de peu d'importance, & en tous les autres seruices de la societé, m'ont tousiours trouué actif & diligent. Comment donc n'eussent ils esté mescontens de ce que i'estois promu à l'Euesché? Ce fut la premiere occasion que i'eus des descendre en terre, s'il faut ainsi dire: quittant l'air des subtilitez & disputes Scholastiques: & de

de reduire mes estudes en action & en pratique, pour auoir vn soing spirituel des ames & de l'Eglise. Et parce que ie recognoissois , que desormais estant Euesque, mon deuoir principal seroit de prescher, ie pris à tasche , selon leur fa-
çon ordinaire , de feuilletter les liures de ceux qui ont faiz des sermons pour le Quaresme, & le reste de l'année. Mais i'en fus bien tost degousté, & ennuié. Car i'y uis, & aisémēt, vn vilain abus des Escritures, les tordans à des sens vains, inutiles, impertinens : quelquesfois mesmes dangereux & pernicieux. Ie vis que les exemples qui y sont apportez, sont ou faux & controuuez : ou pour le moins apocryphes & ridicules. V'y vis combien miserablement on se iouë du pouvre peuple: comment on lui presente , on lui inculque superstitieusement des inventions d'auarice, & d'ambitiōs, au lieu des sainctes doctrines de la foi. Ie le vis , & en eus horreur: & quittant incontinent ces ruisseaux troubles , me resolu d'aller droit aux fontaines des saincts Peres. Ie commençai à me plaire à leur lecture pour mes presches: & à la meditation des saincts & sacrez canons pour le gouuernement de l'Eglise.

Lors de fois à autre les raions de ie ne fcai quelle nouvelle lumiere m'éclairoient mal-gré que i'en eusse, quelque effort que ie fisse au contraire. Ie remarquois d'vn costé, que pour ce qui est de la theorie, & du fond de la doctrine, les sentences des Peres estoient en beaucoup de chef-fort contraires à la creance commune dont i'auois esté imbu aux Escholes, qu'elles avoiēt esté, ou oubliées par mes Maistres, ou peu fidellement citees, expliquees ou non suffisamment , ou mal à propos. De l'autre costé ie voiois non sans estonnement, que la Regle & la Pratique de la discipline Ecclesiastique, & du gouuernement spirituel d'aujourd'hui , est fort different d'avec celle des Anciens. Et de là mes premiers soupçons ne furent pas peu accreus, & m'apercevois aucunement, comme de loin, que nous n'auions pas manié la doctrine & les affai-

res de Christ, & de la sainte Eglise, loialement & en bonne foi, qui garnissons nostre Theologie de raisons ingenieuses & philosophiques tirees de la speculation des hommes, plus que de sentences de l'Ecriture sainte, expliquee & examinee soigneusement, au lieu qu'entre nous elle est du tout ignoree.

D'Evesque ie fus fait Archevesque. Ce me fut encor une nouvelle & plus pressante occasion de renouveler mes estudes d'y travailler avec plus de ferveur & de diligence. Car comme ie me vis attaqué, & par les importunitéz des Evesques Suffragans de ma Province, & beaucoup plus encor par la puissance excessive de la Cour de Rome, qui me troubloit en mes droicts Metropolitain, il me fallut recercher & recognoistre plus avant, la racine de tous les degrez, puissances: charges, offices & dignitez Ecclesiastiques, & sur tout de la Papauté. Survint peu apres l'Interdit de Venise: où on ne cessa à Rome d'avilir, taxer, déchirer par libelles, tous les Evesques de la Seigneurie, comme bestes brutes, gens sans conscience, & sans science, ignorans & mal instruis. De là me fut donnee nouvelle occasion de me remettre à l'estude encor avec plus d'ardeur qu'auparavant, pour composer nos defenses, & recognoistre la verité en la cause de Venise: Il me fallut lire & relire les anciens Canons, les Conciles orthodoxes, la Discipline des Peres, les premieres coustumes de l'Eglise. Que dirai-je plus? I y trouvai entierement ce que ie cherchois, plus mesmes que ie n'en cherchois. Et lors ayant les yeux plus ouvers, il me fut fort aisé de remarquer, que la doctrine des Eglises, que Rome s'est elle mesme suscitee pour adversaires, & en bon nombre, qui sont si asprement censurees & combatues par nos Theologiens, est ou fort peu, ou point du tout esloignée de la vraie & pure doctrine de l'Eglise ancienne; Que ce qui la fait avoir en horreur, la reieter & bannir à vrai dire, & non pas l'impugner, ici & à Rome, n'est pas qu'elle soit en effect hereti-

que ou fausse , mais que c'est par ce qu'elle contrarie aux sens, & aux mœurs corrompus de la Cour Romaine , devenue seculiere, qu'elle reiette ses inventions, & ses opinions humaines. Je vis lors & fort clairement , qu'on nous propose tous les iours une infinité de nouveaux articles de foi, forgez à Rome sans aucun fondement legitime, ains par une violence extreme , en choses qui contiennent en elles des faussetez toutes manifestes , bien loin de faire partie de nostre foi. Et cependant elle ne permet à personne du monde de les éplucher, les examiner , les faire consulter par l'Eglise, comme il se devoit , persecute mesmes iusques à la mort ceux qui osent tant soit peu grommeler à l'encontre , a dès long-temps fermé la bouche aux sacrez Conciles , a consequemment crevé les yeux a la sainte Epouse de Christ: afin que comme un autre Samson, aveuglée & privée de ses forces, esclave deormais, & miserable, elle gemisse en son malheur. C'a esté autresfois un article de foi, que l'Eglise espar due par tout le monde est la vraie Eglise Catholique de Christ, à laquelle il a promis son assistance à jamais , que S. Paul appelle Colonne & appui de verité. Maintenant nos Papistes ont bien retreci cet article: de sorte que par l'Eglise Catholique il faut entendre la Cour du Pape , & croire fermement , que tout l'Esprit de Christ reside en elle seule, ains au Pape tout seul: que tout ce qui a esté autresfois dit en l'honneur de l'Eglise universelle de Christ, soit tiré & attribué violemment à la seule Cour de Rome, non sans faire grand tort à la vraie Eglise: qu'encor on reduise à Rome en articles de foi une infinité de choses, qui i jamais ne furent ordonnées par Iesus Christ , pour piper malheureusement les âmes des fideles, & faire trebuscher & precipiter en l'abyssme de perdition ces povres aveugles avec leurs conducteurs aveugles. Et ces choses entr'autres , me faschent extremement, long-temps y a, & me donnent un ennui incroiable.

Or ie ne veux ici dire un par un , tout ce que i'ai observé

sur ce subiect, les nouveautez sans nombre, & les erreurs
 tres-pernicieux de la Cour Romaine, par le moyen des-
 quels elle exerce une boucherie sur les ames, lasche ou af-
 foiblit tout à fait la vigueur de la discipline Ecclesiastique,
 empesche que la foy ne soit, ou plus avant provignée, ou
 plus exactement repurgee, qu'elle n'est, introduict en l'E-
 glise une infinité de scandales, trouble la paix ciuille des
 Chrestiens, allume des guerres entr'eux, ruine les roiau-
 mes, cause des schismes horribles: bref produit toutes for-
 tes de malheurs. Je deduis amplement tout cela en mon
 œuvre de la Republique Chrestienne: que j'ai des-long-
 temps preparé, & le vais mettre sous la presse, resolu de le
 donner à imprimer au premier Imprimeur d'Allemagne,
 que ie trouuerray à ma commodité en mon voiage. J'ay
 compris tout l'ouvrage en dix liures. Au premier ie recer-
 che la forme de ceste Republique, & conclus que l'Eglise
 sous Christ est une monarchie tres-accomplie. Mais pour les
 Ministres de Christ çà bas en terre, qu'estant fort esloignez
 de toute monarchie terrienne par l'ordonnance mesme de
 leur maistre, ils gouvernent l'Eglise en forme d'Aristogra-
 tie, y mellans aussi quelque chose de la Democratie: le mon-
 stre consequemment que la primauté de S. Pierre, & du Pa-
 pe, repugne extremement & à l'Euangile & à l'institution
 de Christ. Au second, ie considere les Gouverneurs & Mi-
 nistres de la republique Ecclesiastique, quels ils sont, & en
 quelle maniere ils ont succedé aux Apostres: qu'elle est
 l'institution des Evesques, comment ils different d'avec les
 Prestres: quels sont les Ministres inferieurs, & en quoi cō-
 siste l'ordre Sacré en ceste Republique. Au troisieme, j'ex-
 plique la Hierarchie, qui se trouve entre les Evesques, &
 Gouverneurs, de ceste Republique; montre que de droit di-
 vin, il n'y a entre les Evesques, ni preéminence, ni subiection
 aucune: mais que les degres des sieges ne sont distinguez
 entre les Evesques, que de droit Ecclesiastique seulemēt,

& traite en suite de l'election, confirmation, conseruation, ou ordinatiō, des Euesques, des droicts des Metropolitains, Primats, & Patriarches. Au quat riesme, j'examine les privileges de l'Eglise Romaine, & prouue qu'elle n'a receu de Christ aucune preēminence par dessus les autres, ni en son Euesque, ni en son Clergé, & quelle a eu des hommes, & ordonnāces humaines, tout ce qu'elle a d'avantage & de prerogative. Au cinquiesme, ie recherche qu'elle est proprement la puissance & autorité de l'Eglise, prouue qu'elle est purement spirituelle, & reiete loing d'elle toute iurisdiction, & discours consequemment de la vertu & operation des Sacremens: & aussi des Censures. Au sixiesme ie compare la puissance temporelle, avec l'Ecclesiastique, afin qu'on puisse voir quelle difference y a entre une Republique seculiere, & Ecclesiastique, & enseigne que les Princes Chrestiens temporels peuvent beaucoup en l'Eglise, que l'Eglise ne peut rien au temporel, principalement sur les Roys. Ie traite donc du regne temporel de Iesus Christ de la puissance seculiere, d'ou elle prend son origine, & iusques ou elle s'estend, des immunitiez de l'Eglise, & des Ecclesiastiques, des Investiture: de la monarchie de Siciles, & sembiables. Au septiesme, ie considere le gouuernement interieur de la Republique Ecclesiastique par la foy, & examine quelle est la vraie regle de la foi, & ainsi y dispute de la parole de Dieu, de l'autorité de l'Eglise & du Pape sur icelle, les Conciles, de l'heresie du schisme, & semblables matieres. Au huitiesme, ie traite du gouuernement exterieur & de l'Eglise par loix, Canons, & iugemens, disputee de l'obligation des Canons, de la dispensation des ordonnances, des ieusnes, des prieres, & de telles autres chose. Au neuuiesme, ie viens à parler des biens tēporels de l'Eglise: & expose bien au long combié il est expedient que l'entretien des Ministres soit moderé d'ou il doit estre pris, & commēt les biens d'Eglise se sont

administrez. I'y traite donc des decimes, des benefices, du domaine sur les biens d'Eglise, de l'usage & de l'abus des reuenus Ecclesiastiques, des pensions, & commendes & des testamens des Clercs. Au dixiesme & dernier livre, i'entreprends à expliquer les libertés Ecclesiastiques, pour monstrier comment ceste Republique est libre, & parle en suite de cela, des privileges, & privilegiez : des exemptions, & exemptez : de l'abus des privileges, de la subiection des Moines, & autres. Tel a esté le fruiet de mes études. Car lisant soigneusement la Bible, les Peres Orthodoxes, les sacrez Canons, & les volumes des Conciles selon les occasiōs susdites, ie ne me suis peu tenir de mettre par escrit ce que i'y remarquois, aiant des lors les yeux ouuers, & brulant d'un zeile d'expliquer la verité, tant pour moi, que pour les autres. Et c'est ce qui a produit l'ouurage dont ie viens de par courir les sommaires. I'ai donc en fin clairement aperceu, que nos Eglises se fouruoient, & s'esgarent bien loing du droit chemin, soit qu'on considere leur doctrine, soit qu'on ait esgard à leur discipline.

Qu'eusse-je donc plus fait deormais au milieu d'une nation, meschante, & perverse? Si i'eusse voulu entreprendre de gouverner mon Eglise selon l'ancienne discipline de l'Eglise Catholique y prescher la verité, y viure selon elle: j'allois faire esclatter sur ma teste un estrange & facheux orage, du costé de Rome, ou des long temps on couvoit une grande haine contre moi, aiant commencé à decouvrir la peine que ie prenois à escrire contre leurs opinions, Car le Nonce du Pape demeurant à Venize, m'en a aduerti & repris plus d'une fois. J'ai donc mieux fait de prendre les ailes du pigeon, m'envoler, m'esloigner: m'enfuir es Solitudes, pour y attendre celui qui me sauvera de deuant ce vent poussé de la tempeste, que non pas de demeurer aveugle volontaire avec d'autres auengles, & les mener en ruine. Que sont maintenant les Euesques sous la puissance du Pape? Certes pour

ceux qui ont d'amples benefices, de grās revenus, des dignitez eminētes es choses temporelles, ils sont à la verité grās Seigneurs, & Princes: mais Euesques, ils ne le sont nullemēt, si ce n'est qu'on abuse de ce mot, en equivocant, comme on dit aux escholes. Car l'administration des Euesques, entant que tels, est du tout eneatiē: le gouvernement de toutes les Eglises aiāt esté entieremēt restreint à Rome: les Euesques n'estans, & encor à grand peine, que les Vicaires, & Cōmis de Monsieur le Pape: avilis au reste, mesprīez, opprimez, foulez aux pieds: miserablemēt assubietis, non au Pape seulement, mais en outre aux Cardinaux, & à tant de Congregations, qui ont esté instituées à Rome expressément contr'eux: aux Legats (comme on les appelle) à Latere: aux Nonces Apostoliques: aux Inquisiteurs, Visitateurs, & en fin à vne infinité d'ordres de Religieux, qui par les privileges des Papes, ne sont pas seulement mis au pair avec les Euesques, mais mesmes au dessus d'eux, les cōtreroollent & empeschent en leur administration, & engloutissent leur autorité. Ainsi l'Eglise sous la domination du Pape, n'est plus vne Eglise: mais vne Republique du tout humaine, regie temporellement par le Pape: C'est vne vigne, qui ne sert qu'à enyvrier Noé tant seulement: C'est vn troupeau, que le Berger trait iusques au sang: qu'il tōd, qu'il rase, ains qu'il écorche, & qu'il assomme indignement. Et donq, comment ne fuirois-je point, de peur de voir encor ces maux, d'y participer, y contribuer, y cooperer? Christ m'a ordonné pour estre le chien de son troupeau: Je ne dois plus me taire, comme font les autres Euesques, subiects à celui de Rome, qui ne sonnent mot, d'un costé amorcez par l'esperāce, & de l'autre estonnez par la peur: aiment mieux en flatant leur chef, courir ensemble avec lui dans vn mesme precipice. Puis que la complaisance fait des amis, & la verité au contraire engendre haine, ne pouuant ni ne devant aucunement aban-

donner la verité : il faut de necessité que ie me donne garde de la haine ; qui me suiura de pres : que i'eschiue ses effets ordinaires, les empoisonnemens, & les assassins. Car voila où nous en sommes reduits au iourd'hui : Ce n'est plus par les Theologiens, plus par le moien des Conciles qu'on fait vider ou defendre les controuerses de la Religion : On en dōne la charge à Rome, ou de Rome, aux bourreaux, aux bouchers, aux meurtriers, aux parricide, aux assassins.

Quoi que toutes ces considerations m'aient tous iours incité à prendre la resolution de m'enfuir, si ne veux-je point desavouer, que la chambriere Agar avec son Ismael m'a longuement tourmenté & importuné. J'ai souventes fois senti ma chair, qui s'elevoit contre l'Esprit : l'ai ouie lui tenant ce discours : Et bien ou iras-tu en fin ? Tu as obtenu ce royaume du Pape, une dignité assez ample, des biens & commoditez assez grandes, tu peux encore en esperer d'autres si tu y veux aspirer. Tu les possedes. Ce sont choses qui te sont assurees. Et ne sçais pas ce que tu auras ailleurs. Et donc quitteras-tu ainsi ta patrie, tes parens, tes alliez, tes amis sans iamaïs plus retourner à eux : Pourquoi veux-tu estre plus sage qu'une infinité d'autres Evesques ? Ils supportent tout, ils souffrent tout, ils excusent tout. Pourquoi n'en fais-tu autant ? N'ya-il que toi de sage en une foule si espesse. Tous les autres sont ils fous ? Sçais-tu pas bien que aussi tost que tu seras parti, on te blasonnera, à Rome premierement, & puis par tout ailleurs ? on te fustigera, on t'iniuriera, on te diffamera honteusement comme heretique ; Mon Agar m'a souvent soufflé telles choses aux oreilles non sans ressentir au dedans de moi un aspre conflict, vn choc bien rude entr'elle & mon esprit, & ma conscience desia vaincue : Mais l'Esprit de Dieu venant à me pousser plus fort, qu'auparavant, ne m'a pas permis de temporiser d'avantage : & m'a appelé à soi, comme il fit iadis Abraham, par sa parole efficace, di-

fant? Sors de ton pays, & de ta parenté & de la maison de
ton pere? & vien en la terre que ie te monstrerai? & ma don-
né la grace d'accomplir & executer en effect, ce dire tant
celebre des sages, S V I D I E V: ne plus ne moins que le
bon patriarche Abraham l'avoit fait devant, qu'il fust dit
selon la consideration de S. Ambroise, au premier livre
d'Abraham, chapitre second. Et certes ce qu'il fit, m'a par-
tie ne sçai quelle merueilleuse maniere, extremement for-
tifié & encouragé, considerant que la premiere recom-
pense, dont le Seigneur remunerera la prompte obeissance
d'Abraham, fut d'eloigner de lui tout deshonneur & infamie.
Car il preserva la pudicité de Sara sa femme, qui pour
sa grande beauté estoit en extreme danger sous le puissan-
ce d'un tyran. S. Ambroise aussi me console grandement la
dessus, quand il dit: Pour ce que Abraham mesprisâ toutes
choses pour l'amour de Dieu, Dieu qui multiplia toutes
choses. Mais la premiere remuneration qu'il lui donna, fut
de la pudicité, qu'il sçavoit estre agreable à un mari. C'est
aussi fort à propos que le mesme pere adionste: Celui qui
suit Dieu, est tousiours en seureté, & pource, dit-il, devons
nous preferer Dieu à toutes choses, & la consideration de
nostre pays, de nos peres, & meres, de nos enfans, de nos
femmes, ne nous doit iamais destourner ou empescher
d'executer les commandemens du ciel, parce que c'est Dieu
qui nous donne tout cela, & est assez puissant pour nous
conserver ce qu'ils nous donne. Tout cela me fait esperer
que la premiere remuneration que ie recevrai du Seigneur
pour l'avoir suivi, quoi que bien tard, sera qu'avant toute
chose, il aura soing de ma reputation, y pourvoiera si bien
que nonobstant sa beauté, & son lustre tel quel, entre le
maines mesmes des barbares elle ne sera ni violee, ni de-
honoree, ains plustost conservee pure & entiere, sans tache
& sans tare, pour edifier les autres, & eviter tout scandal.
Encouragé par ceste asseurance, touché par ma vocation
emeu par mes dangers propres, ie me resous, fort volo-

18
tiers à ceste fuite.

Si est-ce toutes-fois qu'il n'y a rien qui me presse tant, que la charité de Christ. L'aurois vn bas & chetif courage, si ie m'en allois seulement pour estre en repos : pour me plôger, & engourdir en vne molle oisiveté, quitant la tout travail, & combat legitime. Il est ici questiō de la cause de Christ. C'est elle qui m'appelle à foi. I'oi ceste voix, qui retentit perpetuellement en mes oreilles : **CR IE** : qui m'aduertit de monter sur quelque haute montagne, pour evāgelizer Sio, afin qu'on entende mieux mō cri, joint avec les cris de ceux qui n'ont point ploïé le genou devant Baal. C'est ceste voix la que ie sui. le mōte en quelque lieu asseuré ou la verité Catholique leve & dresse franchemēt la teste: d'ou ie la puisse aussi moi mesme declarer de tout mon pouuoir, selon que i'y suis obligé par ma charge : monstrier & decourir les moiens d'esteindre les schismes, & radoubier l'unité de l'Eglise. L'Eglise orra bien tost mes cris: ie parlerai a Ierusalem selon son cœur: & l'appellerai. Car ie ne puis manquer a ma charge. Je suis Euesque en l'Eglise de Christ. Or chaque Euesque est tellement commis sur son Eglise particuliere, qu'il doit cependant sçauoir, que Christ lui a aussi dōné charge de l'vniverselle, quād besoin en est. Saint Paul dit à tous Euesques, Prenez garde à vous mesmes & à tout le troupeau, auquel le Saint Esprit vous a establis Euesques, pour paistre l'Eglise de Dieu, laquelle il a acquise par son propre sang. Ces mots ici sont communement alleguez sous le nom d'Eleutherius l'un des plus anciens Euesques de Rome: Et pour ce, Iesus Christ vous a donné la charge de l'Eglise vniverselle, afin que vous vous employez pour tous, & que ne mesprisiez de secourir personne. Et saint Cyprian, en l'ep. 13. du 3. l. t, qu'il tient la balance ensemble avec Estienne, Euesque de Rome, au gouvernement de l'Eglise : & adioust : le prs des Prestres est grand & ample, joint & lié ensemble,

avec la colle d'une concorde mutuelle, & le lieu d'vnite
afin que si quelcun de nostre compagnie vouloit faire heresie, & deschirer & degaster le troupeau de Christ, les autres
le peussent secourir. Ainsi le pratiqua Cyprian mesme: Secourât & plus d'une fois, les Eglises travaillées, quoi qu'elles
fussent hors d'Afrique, & la Romaine mesme: comme ie
l'explique plus au long en mon œuvre de la Repub. Ecclesiastique liure 2. & 3. Ainsi Polycarpe, Irenée, Osius de Cordouë, Athanase, Basile, les deux, Eusebes, de Samosate, & de Verfeil, Lucifer Euesque de Calati en Sardaigne, Hilaire de Poictiers, Theophile, & Cyrille Alexandrins, Aurelle de Carthage, & plusieurs autres se sont fort employés, selon leur charge d'Euesques, à subuenir aux necessitez de l'Eglise vniuerselle: & se sont transportez de leur propre auctorité vers les Eglises affligées, & travaillées, laissant cependant les leurs propres bien instruites, & les recommandant à d'autres. Il n'est donc pas hors de ma charge, ains
s'en est vn des devoirs plus particuliers, de secourir de tout mon pouuoir, ainsi que saint Cyprian, m'en aduertit, l'Eglise Romaine, qui fait secte a part, deschire & desgaste le troupeau de Christ, non certes en m'aprochant d'elle, car il n'y a point de seurte à le faire: mais en m'en reculant & departant corporellement. I'eusse bien retenu, & tres-volontiers, mon Eglise de Spalatro, comme Osius, Basile, les Eusebes, Hilaire, & autres que ie viens de nommer, retinrent les leurs, & s'y en retournerent apres auoir paracheué les affaires publiques de l'Eglise Vniuerselle: Mais parce qu'elle gemit avec les autres sous le ioug du Pape qui hait, & refuit la Reformation, l'empesche de toutes ses forces, & de celles des Princes qui lui sont adheras: à puissance de vie, & de mort sur ceux qui en veulent parler, & n'en laisse viure aucun: il a fallu de necessité que i'abandonnasse du tout mon Eglise, afin qu'ayant rompu ces liens, & estant entierement en ma liberté, ie sois plus prompt, & plus pres

20
à celebrer, & prescher la verité, puisse en seureté & a mon
aise, deplorer les bresches, & les ruines, que la Cour Ro-
maine fait en la sainte Eglise.

Certes la majesté d'un Roi terrien est redoutable, se-
cond apres Dieu comme dit Tertullian, & moindre que
Dieu seul, au dessus duquel, comme dit Optatus Milevi-
tain, n'y a personne que Dieu seul. Et de là vient, que quād
il fallut reprendre & tancer le Roi David de son adultere,
& de son meurtre, ni le Souverain Sacrificateur, ni aucun
des Prestres, & Levites, ni de ses amis & familiers, n'en oīa
prendre la charge, Dieu lui mesme, y emploia ses propos
& particuliers ambassadeurs, envoia Nathan le Prophete,
pour tancer le Roi : Mais pour ceste heure, ce n'est point
aux Prophetes à agir avec le Pape de Rome, qui trouble,
scādalize, pille & opprime toutel'Eglise plus que iamais:
il ne faut pas attendre que Dieu suscite des Prophetes
tout expres pour cela, qu'il y emploie des messagers par-
ticuliers. La Majesté de nostre Pape de Rome n'est pas si
grande qu'elle nous doive faire peur, non, non : Ce n'est
qu'une Majesté feinte, temporelle, & pleine d'orgueil: Elle
est usurpee elle est nulle: il est nostre frere, nostre colle-
gue Evesque avec nous: nostre compagnon d'œuvre, &
de besongne: Or, comme il est dit aux Proverbes, un frere
qui est assisté par son frere, est comme une ville forte. Et
que dormons nous donc plus ? Pourquoi ronflons nous
encore? Nostre frere se perd, il entraine avec soi les eglie-
ses en perdition. Et nous, qui sommes ses freres, le negli-
geons, le laissons perdre sans le secourir: Que tous les au-
tres se taisent, qu'ils se reposent à leur aise, qu'ils n'entien-
nent comte, Pour moi certes, quoi que le moindre chien
de la bergerie si veux-je abbaier au mieux qu'il me sera
possible, peut estre esveillerai ie les grands chiés les meil-
leurs dogues, qui dorment, aians esté artificieusement as-
soupis par le Pape, afin qu'ils chassent le loup, gardent &

defendent, selon leur charge, les ouailles de Christ. Je n'emploierai point mes paroles à recueillir ces bons chiens: J'y emploierai celles de Dieu: Je redoublerai les cris des Saints Peres, des Conciles, de l'Eglise vniuerselle. En ces dix liures de la Repub. Ecclesiastique, que ie veux mettre en lumiere, mon principal but, mon plus grand effort est de decouvrir les erreurs du Pape, faire voir quelle est la vraie & saine doctrine, & discipline Catholique tascher à retenir en un sentiment orthodoxe plusieurs Eglises qui ont esté reiettées par la Romaine; monstrier pour le moins du doigt, si ie ne le puis declarer tout à plein le moien, & le chemin qu'il faut tenir pour reünir toutes les Eglises Chrestiennes, nous faire à tous, s'il se pouvoit, dire, & penser une mesme chose, & reprimer les schismes, oster aux Princes Chrestiens l'occasion de s'entrefouler & opprimer les uns les autres, troublans la paix & tranquillité publique de la Chrestienté par guerres fascheuses & vraiment impies, sous ombre cependant de foi & de Religion, à ce que de formais ils abatēt plustost leurs forces & puissance, à recourir & remettre en leur premiere liberté tant de povres Eglises Chrestiennes, qui gemissent sous le joug de tyrans vraiment infideles.

Je desire aussi que ce mien depart, ou sortie hors de Babylon, ne soit point soupçonnée de schisme. Je suis les erreurs, & les abus, ie suis de peur d'estre participât de ses pechez, & de receuoir de ces plaies: Je ne veux neantmoins iamais me separer de la charité que ie dois à la sainte Eglise Catholique, & à chacū mēbre d'icelle, ains entāt qu'en moi est, suis tousiours prest de communier avec tous, tant que nous serons d'accord pour les articles assentiels de nostre foi, & les Symboles de la primitive Eglise: pour veu que nous detestions ensemble & aions en pareille horreur le: nouveantez, qui sont ou manifestement contraires à la sainte escripture, ou éloignées des susdits symboles, sans admettre

pour articles de foi, ceux qui sont indifferens en eux mesmes, qui n'ont iamais esté suffisamment examinés, establis & definis en l'Eglise, que premier ils ne le soient pleinement, ou qu'on ne me monstre qu'ils l'ont desia esté. : sans condamner, aussi comme heretiques, sinon ceux que nous scaurons asseurement, auoir esté condamnés par l'Eglise, ou qui le seront cy apres. Les choses indifferentes, qu'on laisse a chaque Eglise, la liberté, de croire, & faire ce qui lui semblera bon: Que chascune abonde en son sens, iusques à ce que l'Eglise uniuerselle, adressée & conduite par l'esprit de Christ, mette fin avec controverses, & separe les pailles d'avec le bon grain.

Cependant retenons ce mot tant celebre du tres-renommé saint Cyprian, qu'il dit au Concile de Carthage : Ne iugeons personne, dit-il, ne reiettons personne de nostre communion, pour auoir autre sentiment que nous. Car il n'y a personne entre nous qui se soit establi Evesque des Evesques, qui ait contraint & forcé ses collegues à obeyr, par des menaces, & terreurs tyranniques: puis que tout Evesque à son propre iugement, selon que sa liberté & sa puissance lui permet, ne pouvant ni estre iugé par un autre, ni iuger luy mesme un autre. Attendons plus tost tous ensemble le iugement de nostre Seigneur Iesus Christ, lequel seul a puissance, & de nous establis, au gouvernement de son Eglise, & de iuger de nos actions. Cyprian donc estoit pour lors en different sur le Baptisme des heretiques, non avec l'Eglise de Rome seulement, mais quasi avec toutes les autres, il croioit qu'Estienne Evesque de Rome, qui lui resistoit fort asprement la dessus, & tous les autres avec lui, trempoient en une erreur manifeste, & neantmoins iamais il ne voulut laisser rompre, le lien d'union, & de charité, qui estoit entr'eux, de peur qu'il n'en advint un schisme, peste tres-pernicieuse de l'Eglise. Et en cela, Cyprian avec beaucoup de louange surmonta le zele d'Estienne, qui

estoit un peu inconsideré. Car pendant qu'Estienne avec ses excommunications, se precipitoit dans un malheureux schisme, Cyprian destourna le coup, & evita ceste separation par sa patience, charité, & prudence admirable. Saint Augustin l'en louë fort souvent : & propose ses actions à imiter à toute l'Eglise, ne plus ne moins qu'un formulaire, une reigle, & exemplaire.

Et entr'autres, considerant la procedure de S. Cyprian, & sa dispute avec Estienne, il dit au l. 5. du Baptesme contre les Donatistes, chap. 25. la paix de Christ eut le dessus en leurs cœurs, de sorte qu'en un tel different il ne se fit aucun schisme entr'eux. Cyprian donc tenoit pour assuré qu'Estienne erroit lourdement en recevant les heretiques retournans en l'Eglise Catholique, sans les rebaptiser de nouveau. Et toutesfois il aima mieux communier non seulement avec lui, quoi que d'opinion bien éloignée de la sienne, mais mesme avec ceux qu'Estienne recevoit en sa communion, encor qu'il les tint pour impurs, & souillees, que de deschirer l'Eglise par un schisme. Et c'est l'exemple que S. Augustin proposoit iadis à imiter aux Donatistes, & aujourd'hui à nous.

Imitons donc S. Cyprian, Pere Saint, & vous mesmes. honorez Peres, Freres, & Colegues: obeissons à S. Augustin, afin d'oster les schismes sur toutes choses. Car Cyprian, comme remarque S. Augustin, plein des saintes entrailles d'une abondante charité, a creu que ceux qui avoient des opinions differentes, ne devoient pas laisser de demeurer en l'unité. Aions aussi des sentimens divers, iusques à ce que les choses, qui n'ont point encor esté arrestees & definies, le soient tout à plein : mais cependant persistons en union. Car si vous sentez quelque chose autrement, Dieu le vous revelera aussi, comme dit l'Apostre. N'agrandissez point les schismes? Donnez vous garde de rompre le lieu de charité par vos excommunications importunes comme faisoit E-

stienne. Que ces differens ne fassent point naistre de schisme parmi nous? C'estoit cela à quoi S. Augustin mettoit ordre. Reestablishes la paix & la charité à toutes les Eglises Chrestiennes, qui font profession de Christ, selon les Symboles essentiels à la foi. Sçachés pour certain, que le schisme est un mal plus dangereux en l'Eglise, que l'heresie. Montrez promptement à tous vostre communio, gardans chacun vos opinions: bannissans seulement les faussetez d'entre vous. Permettez qu'on face la recherche & l'examen de la verité, selon les façons ordinaires & legitimes de la sainte Eglise. Car ainsi, moiennant la grace de Christ, qui ne la refuse iamais à ceux qui le cherchent en sincerité, j'espere que en peu de temps suivroit es Eglise une pleine paix, concorde, & union necessaire: que nous aurions tous mesme sentiment, demeurerions tous en mesme regle. Allumons nos flambeaux les uns les autres, non des flambeaux de haine, & de rancune, mais d'instruction religieuse & Catholique. Que la parole du Seigneur soit une lampe à nos pieds. Suivons les traces de nos Ancestres, qui ont servi d'une si belle lumiere en l'Eglise Chrestienne: Escarrons & dissipons ces nuages, ces tenebres d'erreurs & de menfonges, par la clarté de la verité Evangelique. Fuions les nouveutez, qui ont presque esteint l'ancienne doctrine, & discipline de l'Eglise, afin qu'il n'y ait qu'une Eglise Chrestienne en terre, liée & unie avec la colle d'une charité parfaite: En laquelle d'un cœur: & d'une bouche nous glorifions Dieu, le Père de nostre Seigneur Iesus Christ.

A M E N.

